

Siunnersuummut nassuiaatit

Nassuiaatit nalinginnaasut**1. Aallaqqaasiut**

1.1. Siunnersuummut pingaarnertut tunuliaqutaasut

Siunnersuut suliarineqarpoq ilaatigut Naalakkersuisut e-sportip timersuutitut akuerisaanissaanut kissaataat tunuliaqutaralugu. Naalakkersuisut naalakkersuisoqatigiinnissaminnik isumaqatigiissutiminni allappaat naalakkersuisoqatigiit e-sportip timersuutitut akuerisaanissaanut sulissuteqarniarlutik.

Siunnersuut aamma suliarineqarpoq Nakorsaaitit Pissassaatitut Atorneqartarnerinut Kalaallit Nunaanni Akiuisunut allattoqarfimmi aqutsisut arlaannaannulluunniit attuumassuteqanngitsumik allattoqarfeqalernissaannik kissaataat tunuliaqutaralugu.

2. Siunnersuummi immikkoortut pingaarnertit

a) Inatsisit atuuttut

Timersorneq timigissarnerlu pillugit Inatsisartut inatsisaat nr. 15, 6. juni 2016-imeersoq tunngavigalugu inatsit atuuppoq.

Timersuummut taaguut pillugu

Timersorneq timigissarnerlu pillugit Inatsisartut inatsisaat nr. 15, 6. juni 2016-imeersumi § 2, imm. 1-mi timersorneq pillugu paasinninnermik nassuiaasoqarpoq. Inatsimmi matumani timersorneq tassaatinneqarpoq timigissarniarluni aamma peqqissarniarluni timi atorlugu sammisaqarneq.

Imm. 2-mi nassuiarneqarpoq timigissarnek qanoq paasineqarnersoq. Kaloriat timimi uunneqartillugit imaluunniit inuit ataasiakkaat timikkut atugarissaarnerat peqqinnerallu nukittorsarniarlugu timi atorlugu sammisaqarnertut timigissarnek nassuiarneqarpoq.

Imm. 3-mi peqqissarniarluni timi atorlugu sammisaqarneq nassuiarneqarpoq. Peqqissarnek tassaatinneqarpoq tarnikkut, sianissutsikkut timikkullu sammisaqartarneq pilerseqqinniarlugu sunngiffimmi sammisaqarneq.

Imm. 4-mi unammilluni timersorneq qanoq paasineqassanersoq nassuiarneqarpoq. Unammilluni timersorneq tassaatinneqarpoq timersornerup ilaa, aalajangersimasunik maleruagassaqaarluni ingerlanneqartartoq, taakkunanilu unamminek ilaalluni.

Tapiissutit pillugit

§ 11-mi aalajangersarneqarpoq Kalaallit Nunaanni Timersoqatigiit Kattuffiata suliaqarneranut aningaasanut inatsimmi ukiumoortumik tapiissuteqarnikkut tassunga

Naalakkersuisut aningaasaliissuteqassasut. Imm. 2-mi aalajangersarneqarpoq tapiissutit allaffissornermi aningaasartuutitut, sulisut, aqutsisut sungiusaasullu ilinniartitaanerannut, immikkut kattuffinnut peqatigiiffinnullu ilaasortaasunut ingerlatitseqqinnermut aamma nunani tamalaani unammiaaarnerni aamma nunani tamalaani timersornikkut suleqatigiinnermi peqataanermut tunngaviusumik tapiissutaasut. Imm. 3-mi aalajangersarneqarpoq tapiissutit ilai siunertanut aalajangersimasunut atorneqartussatut aalajangerneqarsinnaasut. Imm. 4-mi atugassarititat sukumiinerisunik aalajangersakkat tunngavigalugit tapiissutit piumasaqaatitaqarsinnaapput. Imm. 5-imi Naalakkersuisut Kalaallit Nunaanni Timersoqatigiit Kattuffiannik angusaqarnissamut ukiunut sisamanut isumaqatigiissuteqassapput, tassani peqataasut sammisassanut, tassunga ilanngullugit angusassatut piumasaqaatinut, nalunaarusiornissamut naatsorsuusiornissamullu piumasaqaatinut naatsorsuutigisat aalajangersarneqassallutik. Isumaqatigiissut tunngaviusumik pissutsinut atuuttunut eqqarsaatigalugit ukiukkaartumik aaqinneqartassaaq, tassunga ilanngullugit aningaasaliissutit, aamma pisariaqartitsinerit nutaat.

§ 12, imm. 1-imi aalajangersarneqarpoq Naalakkersuisut aningaasanut inatsisitigut Elite Sport Greenlandip suliaqarneranut ukiumut tapiissuteqartassasut. Imm. 2-mi tapiissutit allaffissornermi aningaasartuutit akilerneqarnerinut aamma Elite Sport Greenlandip suliaqarnerani aningaasartuutit akilerneqarnerinut tunngaviusumik tapiissutitut tunniunneqartarput. Imm. 3-mi aalajangersarneqarpoq tapiissutit ilai siunertanut aalajangersimasunut atorneqartussatut aalajangerneqarsinnaasut. Imm. 4-mi aalajangersarneqarpoq tapiissutit piumasaqaatinik erseqqinnerusumik aalajangersarneqartunik aalajangerneqarsinnaasut. Imm. 5-imi aalajangersarneqarpoq Naalakkersuisut Elite Sport Greenlandimik angusaqarnissamut ukiunut sisamanut isumaqatigiissuteqassasut, tassani peqataasut sammisassanut, tassunga ilanngullugu angusassatut piumasaqaatinut, nalunaarusiornissamut naatsorsuusiornissamullu piumasaqaatinut naatsorsuutigisaat aalajangersarneqassapput. Isumaqatigiissut tunngaviusumik pissutsinut atuuttunut ukiukkaartumik nalimmassarneqartassaaq, tassunga ilanngullugit aningaasaliissutit, aamma pisariaqartitsinerit nutaat.

§ 13, imm. 1-imi aalajangersarneqarpoq Kalaallit Nunaanni Timersoqatigiit Kattuffiannut aamma Elite Sport Greenlandimut Naalakkersuisut tapiissuteqarnerini piumasarineqartoq taakku nakorsaaitit pissassaaitut atorneqartartut pitsaaliornissaat akiuinerlu pillugu Nakorsaaitit Pissassaaitut Atorneqarnerinut Kalaallit Nunaanni Akiuisut maleruagassanik aalajangersagaanik malitsissasut eqqortitsissasullu pillugu maleruagassanik aalajangersaaneq, tak. § 21, imm. 2, nr. 5. Malittarisassanik taakkuninnga peqqarniitsumik, arlaleriarluniluunniit unioqqutitsinerit tapiiffigitinnissamut pisinnaatitaajunnaarnermik kiisalu tapiissutit tunniunneqarsimasut utertillugit akiliisoqarnissaannik piumasaqaateqarnermik kinguneqassaaq. Imm. 2-mi aalajangersarneqarpoq Kalaallit Nunaanni Timersoqatigiit Kattuffiannut aamma Elite Sport Greenlandimut Naalakkersuisut tapiissuteqarnerini piumasarineqartoq timersorluni unamminernik allanngortiteriniarnerup pitsaaliornissaa akiuiniarnerlu pillugit Naalakkersuisut maleruagassiaannik malinnissasut atuissasullu maleruagassanik aalajangersaaneq, tak. § 5 imm. 2. Malittarisassanik taakkuninnga

peqqarniitsumik, arlaleriarluniluunniit unioqquitsinerit tapiiffigitinnissamut pisinnaatitaajunnaarnermik kiisalu tapiissutit tunniunneqarsimasut utertillugit akiliisoqarnissaannik piumasagaateqarnermik kinguneqassaaq.

§ 19-imi aalajangersarneqarpoq Kalaallit Nunaanni Timersoqatigiit Kattuffiat tassaasoq Kalaallit Nunaanni timersornikkut timigissarnikkullu aaqqissugaasumik ingerlataqarnermut nuna tamakkerlugu pisortatigoortumik sinniisoq. Kattuffik pisortatigoortumik Kalaallit Nunaannut, matumani nunanut tamalaani pisartut ilanngullugit sinniisuuvoq.

§ 20-mi aalajangersarneqarpoq suliffeqarfik imminut pigisoq Elite Sport Greenland tassaasoq timersortartunik pikkorissunik siuarsaanermi inerisaanermilu Kalaallit Nunaanni nuna tamakkerlugu sulisoq. Kalaallit Nunaanni Timersoqatigiit Kattuffiat peqatigalugu pisortatigoortumik Kalaallit Nunaannut, matumani nunani tamalaani pisartut ilanngullugit sinniisuuvoq.

Imm. 2-mi aalajangersarneqarpoq Elite Sport Greenland Kalaallit Nunaanni Timersoqatigiit Kattuffiat tassanilu immikkut kattuffiit, timersoqatigiiffiit aamma timigissartarfiit suleqatigalugit siunertaminik tapersersuissasoq, ilaatigut ukununga tapersersuinnermigut:

- 1) timersornermik piginnaasallit timersortartullu pikkorivissut sungiusarnerinut aamma unamminerni peqataanerinut, nunani tamalaani pikkorivissut timersornerini peqataanissamut periarfissamik siuarsaasoq,
- 2) nunani tamalaani timersornermi kingusinnerusukku peqataanissaq siunertaralugu piginnaasalinnik inerisaaneq,
- 3) pikkorivissut pillugit sungiusaasut ilinniartitsinerillu,
- 4) Kalaallit Nunaanni timersornermi nakorsaanikkut immikkut ilisimasalinnik ineriartortitsineq, aamma
- 5) pikkorivissut soqutigisaannik isumaginninneq nunanilu tamalaani peqataanissaq siunertaralugu Kalaallit Nunaanni immikkut kattuffinnik aaqqissugaasumik ineriartortitsineq.

Imm. 3-mi aalajangersarneqarpoq Elite Sport Greenland Naalakkersuisut suleqatigalugit timersornikkut piginnaasaqartunik pikkorivissunillu tapersersuissasoq timersornikkut piginnaasaqartoq pikkorivissorlu timersornermik ingerlataqarnermi saniatigut ilinniarnissamut periarfissaqartillugu.

Allattoqarfimmik sullissineq

§ 22, imm. 5-imi aalajangersarneqarpoq Kalaallit Nunaanni Timersoqatigiit Kattuffiat Nakorsaatit Pissasaatit Atorneqarnerinut Kalaallit Nunaanni Akiuisunut allattoqarnerinut ikiuutissasoq.

2.2 Siunnersuutip imarisaa

Siunnersuut Inatsisartut inatsisaata atuuffianik annertunerulersitsivoq, tassa e-sport qarasarsorlunilu unammiaarnerit unammiaarluni timersuutitut taaguutitut ilanngunnissaat siunnersuutigineqarmat.

E-sport pillugu tamanna ilanngunneqarpoq naalakkersuisoqatigiit tassunga isumaqatigiissutaannut kissaataat tunuliaqutaralugu. Tassunga tunuliaqutaavoq e-sportip ingerlaavartumik ineriartornera takuneqarsinnaammat, aamma Nunatsinni. Aamma e-sport nunani arlalinni timersuutitut akuerisaavoq, kiisalu Nunat tamalaat akornanni Olympiske Komitép aalajangiuppaa 2027-mi Olympic Esports Gamesertoqassasoq.

Qarasarsorluni unammiaarnerit ilanngunneqarsimapput, qarasarsorluni unammiaarnerit nunarpassuarni timersornertut akuerisaammata, qarasarsorlunilu unammiaarnerit ilaat (skak aamma bridge) Nunat assigiinngitsut akornnganni Olympiske Komitémit timersuutitut akuerisaallutik. Naalakkersuisut aamma qarasarsorluni unammiaarnerit timersuutitut unammissutitut akuerineqarnissaat pissusissamisoorsoraat.

Qarasaasiat atorlugit unammiaarnerit nalinginnaasumik e-sportimik taaneqartarput. Siunnersuummi taaguut e-sport atorneqarpoq. Taamatut pinnguaateqarluni timersorneq qarasaasiani, pinnguaatini imaluunniit oqarasuaatini nassartakkani ingerlanneqartarpoq. Timi atorlugu timersornerit IT ikiortigalugu ingerlanneqartut taaguutip e-sportip ataaniittutut nalinginnaasumik isigineqarneq ajorput. Soorlu tassaasinnaallutik e-cykling aamma e-roning. Siunnersuummi atorneqarpoq e-sport.

Timersuutit angusaqarnissamut timikkut piginnaasanik aallaaveqanngitsut, taamaallaalli sianissusermik tarnermillu iluaquteqartut, eqqarsaasorsorluni timersornernut ilaapput. Pinnguaat eqqarsaasorsorluni timersuutitut taaneqarsinnaalissappat angusaqarneq pinnguartup piginnaasanik siullermik tunngaveqartariaqarpoq. Soorlu skak, backgammon, bridge aamma allat nerrivimmi pinnguaatit aamma inukkanik pinnguaatit akissarsiutigalugit ingerlanneqartut eqqarsaasorsorluni timersuutitut ilaapput. Nunat assigiinngitsut akornnganni kattuffiit taaneqarsinnaasut soorlu International Mind Sports Association (IMSA)-ip sinniisuuffigai skak, bridge, go, mahjong aamma poker il.il..

Timersornermut nassuiaammi § 2, imm. 1-miittumi timigissarnermullu imm. 2-miittumi aalajangersimasumik siunertaqarluni timikkut sammisaqarnissaq naatsorsuutigineqarpoq. E-sportit aamma eqqarsaasorsorluni timersuutit timimik atuinissaq pisariaqartinngillat, tamannali timersornermut timigissarnermullu nassuiaammi allassimavoq. Taamaattumik e-sport aamma eqqarsaasorsorluni timersorneq timersornermut timigissarnermullu inatsit naapertorlugu ilaatinneqanngillat. Aamma allani inatsisiliornerni e-sportimut eqqarsaasorsorlunilu timersornermut tunngasunik aalajangersagaqanngilaq.

Aalajangersimasumik siunnersuutigineqarpoq unammissutitut timersorneq pillugu nassuiaatip allanngortinnissaa, taamaalluni erseqqissarneqarluni unammissutitut timersorneq timikkut, qarasarsornikkut elektroniskitigullu unammissutaasut nassuiarneqarlutik. E-sportip qarasarsorlunilu unammiaarnerit immikkuullarissutaat tassaapput unammissutitaqarmata, taamaammallu taamaallaat unamminermi timersornermi e-sport qarasarsorlunilu unammiaarnerit attuumassuteqarlutik.

Aamma timersorneq, timigissarneq peqqissarnerlu pillugit nassuiaatit peerput. Peqqissarneq pillugu nassuiaat timersorneq qasujaallisarnerlu pillugit Inatsisartut inatsisaanni atuuttumi taamaallaat ilanngunneqarsimavoq, peqqissarneq nassuiaammut qasujaallisarnermut nassuiaammut ilaatinneqarmat. Timersorneq qasujaallisarnerlu taaguutigitinneqarput nalinginnaasut qaqugukkulluunniit taakkununga nalinginnaasumik paasinnittarnermut naapertuuttumik paasineqartariaqartut. Timersorneq pillugu nassuiaammik aalajangiusseqqaneq aamma unammiauarluni timersornermut nassuiaammut nutaamut siunnersuutigineqartumut ataqatigiissinniarneqarnera ajornakusuussaaq.

Kalaallit Nunaanni e-sport Inuit Esportimit aaqqissuussaavoq, taannalu inuit naapittarfianni nassaarineqarsinnaalluni. E-sport Kalaallit Nunaanni Timersortartut Kattuffiannit timersuutitut akuerisaanngilaq.

Kalaallit Nunaanni qarasarsorluni unammiauarneq skak eqqarsaatigalugu peqatigiiffeqarpoq – Kalaallit Nunaanni Skakkertut Kattuffiat, tassungaluklubbit ilaasortat kattuffimmut ilaallutik. Kattuffiup nittartagaani atuarneqarsinnaavoq skakkertartut nunat tamalaat akornanni unammiauarnerni peqataasareermata. Qarasarsorluni unammiauarneq Kalaallit Nunaanni Timersortartut Kattuffiannit timersuutitut akuerisaanngilaq.

Naatsorsuutigineqarsinnaavoq peqatigiiffiit allat e-sportimik qarasarsorlunilu unammiauarnermik ingerlataqartut pilersinneqarnissaat, e-sportip qarasarsorlunilu unammiauarnerit timersuutit ilaattut akuerineqarsimaleriarpata. E-sportimik qarasarsorlunilu unammiauarnerit timersuutitut akuerineqarsimaleriarpata timersuutit taakku aamma Naalakkersuisunit taperneqarsinnaalissapput.

E-sport qarasarsorlunuunniit unammiauarneq Kalaallit Nunaanni Timersoqatigiit Kattuffiannit timersuutitut akuerisaanngimmata, kattuffiup imaaliillaanaq § 11, imm. 2 malillugu immikkut kattuffinnut aamma e-sportimut qarasarsorlunilu unammiauarnermut tapiissutit ilaannik atuinissamut pisussaatinneqassanngilaq. Immikkut kattuffiit taakku ilaasortatullu peqatigiiffiit aamma Naalakkersuisunit taperneqarsinnaalernissaat Naalakkersuisut siunertamut naapertuuttutut isigaat. Siunnersuummi taamaattumik Kalaallit Nunaanni Timersoqatigiit Kattuffiannut ilaasortaangitsunut immikkut kattuffinnut timersoqatigiiffinnullu aningaasanut inatsimmi ukiumut tapiissuteqarnissamut Naalakkersuisut aningaasaliissuteqarnissaat aalajangersarneqassaaq. Tassunga atatillugu tapiissutit ilai siunertanut aalajangersimasunut immikkut atugassanngortinneqassasut tapiissutinullu erseqqinnerusumik piumasaqaatit piumasaqaatigineqassasut aalajangersarneqassaaq. Aalajangersagaq § 11 a-tut ilanngunneqassasoq siunnersuutigineqarpoq.

E-sportip qarasarsorlunilu unammiauarnerit timersuutitut unammissutitut akuerisaanerisa kingunerisaannik siunnersuummi § 13-ip allanngortinnissaa siunnersuutigineqarpoq, taamaalilluni tassani aalajangersakkat aamma immikkut kattuffinnut timersornermullu peqatigiiffinnut Kalaallit Nunaanni Timersornermut Kattuffimmut ilaasortaangitsunut

tapiissuteqartoqartarnissaanik ilassaaq. Aalajangersakkammi pineqarpoq sukasaatinik atuinissamut pitsaaliuineq pillugu malittarisassanik malinnittussaataaneq kiisalu malitsitsineq aamma timersorluni unamminermi allanngortitsinernik akiuineq.

Aamma sunniutaasussaq tassaavoq § 19-ip allanngortinnera imm. 2-mik ilanngussinikkut. Immikkoortumi 2-mi aalajangersarneqarpoq timersuutini immikkut kattuffiit timersoqatigiiffiillu Kalaallit Nunaanni Timersoqatigiit Kattuffianut ilaasortaannigitsunut eqqarsaatigalugit, timersuummi pineqartumi kattuffiup pisortatigoortumik Kalaallit Nunaat, tassunga ilanngullugu nunat tamalaat sinniisuuffigissagai.

Aamma tamatuma kinguneranik § 20, imm. 1 aamma 2-p allanngortinnissaat siunnersuutigineqarput. Imm. 1-mi tamanna pivoq ima ilassuteqarnikkut: " Pisortatigoortuni, soorlu nunat assigiinngitsut akornganni, Kattuffik Kalaallit Nunaannut sinniisuvoq. Timersornikkut timigissarnikkullu aqqissugaasumik ingerlataqarneq pillugu Kalaallit Nunaanni Timersoqatigiit Kattuffiat peqatigalugu sinniisuuneq pisarpoq. Immikkut kattuffik aamma timersortartut peqatigiiffiat Kalaallit Nunaanni Timersoqatigiit Kattuffiannut ilaasortaannigikkaangat timersuummi pineqartumut immikkut kattuffik peqatigalugu sinniisuuneq pisartoq." Imm. 2-mi aallaqqaasiut imatut allanngortinneqarpoq: " Elite Sport Greenland Kalaallit Nunaanni Timersoqatigiit Kattuffiat tassanilu immikkut kattuffiit, matumani Kalaallit Nunaanni Timersoqatigiit Kattuffianut ilaasortaannigitsut, timersoqatigiiffiit aamma timigissartarfiit suleqatigalugit siunertaminik tapersersuissaaq ilaatigut ukununnga tapersersuinermit:" Taamaalilluni ilassut tassaalerpoq "Immikkut kattuffik Kalaallit Nunaanni Timersoqatigiit Kattuffiannut ilaasortaannigikkaangat"

Tamatuma kinguneranik § 23, imm. 1-ip allanngortinnissaa siunnersuutigineqarpoq. Kalaallit Nunaanni Timersoqatigiit Kattuffianut ilaasut immikkut kattuffiit, timersoqatigiiffiit, timersornermi peqatigiiffiit aamma timigissartarfiit avataanni timersornermi timigissarnermilu ingerlataqartut kattuffiit. Tamatuma kingunerissavaa Nakorsaatit Pisassaaitut Atorneqartarnerinut Kalaallit Nunaanni Akiuisut pissassaatinik atuinermik akiuinermit pitsaaliuinerimullu immikkut kattuffinnut timersoqatigiinnullu peqatigiiffinnut suleqatigiinnissamik isumaqatigiissusiornissaat.

Tamatuma kinguneranik § 24, imm. 1-ip allanngortinnissaa siunnersuutigineqarpoq. Tamanna pivoq ilassuteqarnikkut immikkut immikkut kattuffiit timersornermullu peqatigiiffiit Kalaallit Nunaannit Timersornermut Kattuffimmut attuumassuteqannigitsut immikkut kattuffiit, timersornermut peqatigiiffiit kiisalu qasujaallisarfiit timigissartarfiillu atuisunut aamma ilisimatitsissuteqartussaataalernerannik Nakorsaatit Pissassaaitut Atorneqartarnerinut Kalaallit Nunaanni Akiuisunik suleqatigiinnissamut isumaqatigiissuteqarsimanerlutik.

Taakku saniatigut § 22, imm. 5-ip allanngortinnissaa siunnersuutigineqarpoq, taamaalilluni aalajangersarneqarluni Naalakkersuisut Nakorsaatit Pissassaaitut Atorneqartarnerinut Kalaallit Nunaanni Akiuisunut allattoqarfimmik ikiuutissallutik. Maanna Kalaallit Nunaanni

Timersoqatigiit Kattuffiat Nakorsaaitit Pissassaaititut Atorneqarnerinut Kalaallit Nunaanni Akiuisunut allattoqarfimmik ikiuupput. Kalaallit Nunaanni Timersoqatigiit Kattuffiat timersortartunut peqatigiiffiuvoq. Nakorsaaitit Pissassaaititut Atorneqarnerinut Kalaallit Nunaanni Akiuisut arlaannaannulluunniit naak attuumassuteqanngikkaluartut Kalaallillu Nunaanni Timersortartut Kattuffianit attaveqanngikkaluarluni pissassaatinik akiuiniarnermut ataqatigiissaarisut, allattoqarfiup Kalaallit Nunaanni Timersortartut Kattuffiannit avissaartillugu nukittorsarneqartariaqarput, taamaalillunilu tamanut soqutigisanik aporaattoqannginnera takutillugu. Nakorsaaitit Pissassaaititut Atorneqarnerinut Kalaallit Nunaanni Akiuisunut immikkut allattoqarfiliornikkut siunnersuutikkut qulakkeerneqassaaq allattoqarfiup arlaannaannulluunniit attuumassuteqannginnissaa.

3. Pisortanut aningaasaqarnikkut allaffissornikkullu sunniutissat

Siunnersuut pisortanut allaffissornikkut kinguneqassanngitsutut nalilerneqarpoq.

E-sportip qarasarsorlunilu unammiaarnerit eqqarsaatigalugit immikkut kattuffinnut timersornermullu peqatigiiffinnut qanoq tapiissuteqartigisoqassanersoq aningaasanut inatsimmi aalajangersarneqartarpoq.

Nakorsaaitit Pissassaaititut Atorneqarnerinut Kalaallit Nunaanni Akiuisunut allattoqartitsineq eqqarsaatigalugu allannguutissatut siunnersuutigineqartup, tassa Kalaallit Nunaanni Timersoqatigiit Kattuffiannit Naalakkersuisunut allattoqarfiup nuunneranik nassataqartussap, Kalaallit Nunaanni Timersoqatigiit Kattuffiannut tapiissutaasartut ukiumut tapiissutinik 300.000 kr.-inik sulinermit missingersuutigineqartutut aningaasartuut ikileriarnerannik kinguneqassaaq. Naalakkersuisut aalajangerpaat kikkut allattoqarfimmi ikiortaassanersut, tassungalu atatillugu aningaasanik nuussisoqassaaq.

4. Inuussutissarsiutinik ingerlataqartunut aningaasatigut allaffissornikkullu sunniutissat

Inuussutissarsiortunut aningaasatigut allaffissornikkullu kinguneqarnissaa naatsorsuutigineqanngilaq.

5. Avatangiisinut, pinngortitamut inuillu peqqissuunissaannut sunniutissat

Siunnersuut avatangiisinut pinngortitamullu aningaasaqarnikkut aqutsinikkullu kinguneqarnaviannngilaq. E-sportimik sungiusarnej, timikkut sungiusarnermik tapertaqartinneqartoq, taakkuninnga sammisaqartunut timikkut tarnikkullu peqqissuunermik annertusaasinnaavoq.

E-sportimik sungiusarnej aamma eqqarsaasorsorluni timersorneq timersortup eqqarsarsinnaaneranut inooqataanerannullu pitsaasumik sunniuteqarsinnaavoq, soorlu e-sportip ataani inuusuttut inooqataanikkut tarnikkullu unammilligassaqartut ataatsimooqatigiinnernut peqataalersinnaapput. Eqqarsaasorsorluni timersorneq peqataasut itisilerisinnaassuseqarnerannut pitsaasumik sunniuteqarsinnaavoq. Utoqqaat

eqqarsarsinnaassusermut sunniuteqarluartunik sammisaqartartut puigortunngornermik eqqorneqarnissamut sunniutissaanik annikillisisinnaavoq.

Killormulli ingasattumik pinnguaatinik ingerlataqarneq sinnarliornermik, inuunermi inoqatinut matoqqanermik kiisalu timimik atuinngippallaarnermik kinguneqarsinnaavoq.

E-sportimik akuersaarneq nammineq iliuuseqarnerunermik kinguneqarsinnaavoq. Nammineq iliuuseqarneq peqatigiiffinnut ingerlalluartitsisartoq innuttaasut eqqarsarsinnaanerisa peqqissuunissaannut iluaqusiissaaq.

6. Inuttut piginnaatitaaffinnut aamma innuttaasunut kingunerisassat

Innuttaasut naatsorsuutigissavaat sammisassanut periarfissat amerlissasut, peqatigiiffiit e-sportimik qarasarsorluniluunniit unammiaarutininik suliallit timersornermik peqatigiiffiit timersuutininik akuerisaasunik suliaqartut allat assigalugit tapiissutininik qinnuteqarsinnaalerpata.

Timersorneq timigissarnerlu pillugit Inatsisartut inatsisaanut e-sport qarasarsorlunilu unammiaarnerit ilaalerpata peqatigiiffilerisut nukittorsarneqassasut naatsorsuutigineqarsinnaavoq. Peqatigiiffilerisut nukittorsarneqarpata inunnut ataasiakkaanut sammisaqarsinnaanerit sunniuteqassasoq naatsorsuutigineqarpoq, timikkuinnaanngitsoq aammali tarnikkut eqqarsartaatsikkullu sunniuteqassalluni.

E-sport aamma eqqarsaasorsorluni timersorneq innuttaasullu peqatigiiffinni timersornermilu inooqataanikkut ataatsimoornermut peqataatitsinerit iluaqutaasinnaavoq, tassami e-sport aamma eqqarsaasorsorluni timersorneq suaassuseq, ukiorisat, timikkut tarnikkullu innarluuteqarnerit nunallu suatungaaniinnerit akimorlugit ingerlanneqarsinnaammata.

Taamaattumik naatsorsuutigineqarpoq FN-ip innarluutillit pillugit isumaqatigiissutaanni arktikel 9, imm. 1-imut tunngatillugu, siunnersuut pitsaasumik kinguneqassasoq, immikkut tassani timikkut tarnikkulluunniit innarluiutillit timersornermi nunap iluani aammalu nunat tamalaat akornanni peqataasinnaalernissaat.

Nakorsaatit Pissassaatitut Atorneqartarnerinut Kalaallit Nunaanni Akiuisunut allaffeqarfeqarnermut aalajangersakkanik allanngortitsineq ataatsimiititaliap arlaannaanulluunniit atanani ingerlanissaanut annertunerusumik qulakkeerinnissaaq.

7. Nunanut allanut attaveqarnermut nunallu immikkoortuisa assigiinnginnerannik millisaaniarluni politikkimut allanullu sunniutissat

Nunanut allanut attaveqarnermut nunallu immikkoortuisa assigiinnginnerannik millisaaniarluni politikkimut allanulluunniit siunnersuut pingaartutigit sunniuteqassanngilaq.

8. Oqartussaasut suleqatigiiffiillu il.il. tusarniaavigineqarnerat

Siunnersuut piffissami xxxx -mit xxxx 2025-mut Naalakkersuisut tusarniaanernut nittartagaanni tamanut ammasumik saqqumitinneqarpoq piffissamilu tassani tusarniaaffissatut

attuumassuteqartunut tamanut tusarniutigineqarluni. Tassunga atatillugu ilanngussaq 2
tusarniaanermut tunngasoq innersuunneqarpoq.

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Imm. 1-imut

Timersornerup erseqqarinnerusumut qaffasinnerusumullu pisortat akisussaaffigisaattut inissinneqarnissaa pingaassuseqalernissaalu inatsisissatut siunnersuummi anguniarneqarpoq, soorlu immikkoortumi pisortat aamma timersortartut kattuffiisa akisussaaffiinik erseqqissaanikkut.

Inuiaqatigiinni immikkoortuni tamani timersornerup timigissarnerullu qulakkeerneqarnissaa pisortat akisussaaffigaat timersornikkut kattuffiit suleqatigalugit, soorlu atualinnginnermi atuarfimmilu, ilinniartitaanermi, sunngiffimmi neqeroorutini, suliffimmi aamma peqqinnissaqarfimmi inunnillu isumaginninnermi.

Imm. 2-mut

Aalajangersakkami erseqqissarneqarput unammilluni timersuutit timikkut, eqqarsartaatsikkut kiisalu elektroniskiusunit ingerlanneqarsinnaasut.

Unammilluni timersuutit, eqqarsartaatsikkut ingerlanneqartut, tassaapput qarasarsorluni unammiaarnerit, soorlu skak, bridge aamma backgammon.

Unammilluni timersuutit, elektroniskinik ingerlanneqartut, tassaapput e-sportit. Elektroniskimik unammissutit tassaasinnaapput qarasaasiat, pinnguaatit imaluunniit oqarasuaatit nassartakkat.

E-sportip imaluunniit qarasarsorluni unammiaarnerup timersuutitut unammissutitut ilaatinneqassappata timersuut aalajangersakkami oqaaseqatigiinnik siullernik eqquutsitsisimassapput. Tassani aalajangersarneqarpoq unammilluni timersorneq tassaasoq timersornermi unaminertalimmi, malittarisassat aalajangersimasut malillugit ingerlanneqartartoq.

Nr. 2-mut

§ 2, imm. 2-mi timersorneq, qasujaallisarneq peqqissarnerlu pillugit nassuiaatit peerneqarput. Tamanna pillugu oqaaseqaatit nalinginnaat innersuussutigineqarput. Unammissutitut timersorneq pillugu imm. 4-mi nassuiaat peerneqarpoq § 1, imm. 2-milu allannguutissatut siunnersuummi oqaasertaliussanik taarserneqarlutik.

Nr. 3-imut

Imm. 1-imut

Oqaaseqatigiit ”immikkut kattuffiit timersornermullu peqatigiiffiit, Kalaallit Nunaanni Timersoqatigiit Kattuffiannut ilaasortaangitsut” ima paasineqassapput, kattuffiit peqatigiiffiillu timikkut timersornermik ingerlataqartut Kalaallit Nunaanni Timersoqatigiit Kattuffiannut ilaasortaangitsut, kiisalu kattuffiit peqatigiiffiillu e-sportimik qarasarsorlunilu unammuaarnermik ingerlataqartut. Tamanna siunnersuummi aalajangersakkanut taassuminnga atuisunut atuuppoq.

Kattuffiit peqatigiiffiillu taama ittut kingorna Kalaallit Nunaanni Timersoqatigiit Kattuffiannut ilaasortanngussagalarpata Kalaallit Nunaanni Timersoqatigiit Kattuffiannut tapiissutit aqqutigalugit tapiissutinik pisalersinnaassapput.

Imm. 2-mut

Kalaallit Nunaanni Timersoqatigiit Kattuffiannut tapiissuteqartarnek eqqarsaatigalugu tapiissutit ilai siunertanut aalajangersimasunut immikkut atugassanngortinneqassasut tapiissutinullu erseqqinnerusumik piumasaqaatit piumasaqaatigineqassasut aalajangersarneqassaaq. Akerlianilli pisariaqanngilaq, Naalakkersuisunut kattuffinnut timersornermullu peqatigiiffinnut taama ittunut naammassisaqarnissamik isumaqatigiissusiornissaat. Taamaattoq tamatumani Naalakkersuisut taama ittumik naammassisaqarnissamik isumaqatigiissusiornissaannut mattunneqanngillat, Naalakkersuisut kattuffiillu imaluunniit timersornermik peqatigiiffiit tamanna siunertanut naapertuuttutut isumaqarfigippassuk. Taamaangippat tapiissutinit siunertalittut aaqqissuunneqarsinnaapput tapiissutit ilaannik siunertanut aalajangersimasunut atugassiinnikkut kiisalu atugassarititanik aalajangersaanikkut.

Imm. 3-mut

Aalajangersagaq imm. 1-imut naleqqiullugu atuarneqassaaq, tassanilu allaqqavoq immikkut kattuffinnut timersoqatigiiffinnullu Kalaallit Nunaanni Timersoqatigiit Kattuffiannut ilaasortaangitsunut Naalakkersuisut tapiissuteqartartut. Tapiissutit piumasaqaatitaqalersinneqarpata imm. 1-imi allassimasunut pissusissamisoortumik atassuteqassapput.

Nr. 4-mut

Imm. 1-imut

Aalajangersakkap siunertaraa tapiissutinik aningaasaliinnikkut qulakkeerneqassasoq tapiissuteqarfigineqartussat pissassatinik atuinermut pitsaaliuinermut akiuiniarnermullu malittarisassanik malinninnissamik eqquutsitsinissaat. Oqaaseqatigiit aappaanni aalajangersakkami erseqqissarneqarpoq peqqarniitsumik arlaleriarluniluunniit unioqqutitsinerit tapiiffigitinnissamut pisinnaatitaajunnaarnermik kiisalu tapiissutit tunniunneqareersut utertillugit akiliisoqarnissamik piumasaqaateqarnermik kinguneqassasoq.

Imm. 2-mut

Aalajangersakkami siunertaavoq tapiissutinik aningaasaliinikkut qulakkeerneqassasoq tapiissuteqarfigineqartussat timersorluni unamminermik allanngortiteriniarnernik pitsaaliornissaq akiuinissarlu pillugit malittarisassat malissagaat.

Nr. 5-imut

Imm. 1-imut

Aalajangersakkami taamaallaat allannguutaavoq "taamaattorli imm. 2 takuuk" ilanngunneqarmat takutinniarlugu pisut ilaanni Kalaallit Nunaanni Timersoqatigiit Kattuffiat Kalaallit Nunaanni aaqqissuussamik timersornermut timigissarnermullu suliaqarnermut Kalaallit Nunaat sinnerlugu sinniisuusarsinnaanngimmat.

Imm. 2-mut

Timersuummi pineqartumi immikkut kattuffeqarpat Kalaallit Nunaannut immikkut kattuffik sinniisuusassaaq. Tamatumani takutinniarneqarpoq immikkut kattuffiit tassaatinneqarmata kattuffiit timersuummi pineqartumi timersornermik peqatigiiffiit soqutigisaannik isumaginnittut.

Nr. 6-imut

Imm. 1-imut

Pisortatigoortuni, soorlu nunat assigiinngitsut akornganni, Elite Sport Greenlandip Kalaallit Nunaannut sinniisuusoq aalajangersakkap aalajangerpaa. Aalajangersakkami aamma aalajangerneqarpoq sinniisuunermut kikkut peqatigineqartassanersut.

Aalajangersakkami erseqqissarneqarpoq timersuutini immikkut kattuffiit timersoqatigiiffiillu Kalaallit Nunaanni Timersoqatigiit Kattuffiannut ilaasortaannngitsut eqqarsaatigalugit timersuummi pineqartumi kattuffiup pisortatigoortumik Kalaallit Nunaat, tassunga ilanngullugu nunat assigiinngitsut akornganni sinniisuuffigissagai.

Imm. 2-mut

Aalajangersakkami Elite Sport Greenlandip suleqatigalugu siunertaminik qanoq tapersersuissanersooq aalajangersarneqarpoq. Immikkut kattuffiit Kalaallit Nunaanni Timersoqatigiit Kattuffiannut ilaasortaannngitsut ilanngunneqarput.

Aalajangersakkap aalajangerpaa soorlu manna tikillugu ilaatigut siunertaq qanoq siuarsarneqassanersooq.

Nr. 7-imut

Aalajangersakkami aalajangerneqarpoq aalajangiisartut allattoqartinnerisigut Naalakkersuisut ikiuuttassasut.

Allattoqartitsilluni ikiuunnermut allattoqarfimmik ingerlatsinermi suliassat nalinginnaasut ilaatinneqassapput, soorlu ataatsimiinnernik pilersaaruserneq, Nakorsaatit Pissasaatitut Atorneqartarnerinut Kalaallit Nunaanni Akiuisut sulinerannut tunngasunik apeqqutinik

aalajangiisartunut ingerlatitseqqiineq, aammali aalajangiisartut suliassaminnik isumaginnerannut ikiuunneq.

Nr. 8-imut

Aalajangersagaq allanngortinneqarpoq nr. 2-mik ilanngussinikkut, tassa Kalaallit Nunaanni Timersoqatigiit Kattuffianut ilaasut immikkut kattuffiit, timersoqatigiiffiit, timersornermi peqatigiiffiit aamma timigissartarfiit avataanni timersornermi timigissarnermilu ingerlataqartut kattuffiit. Tamatuma kingunerissavaa Nakorsaatit Pisassaaitut Atorneqartarnerinut Kalaallit Nunaanni Akiuisut pissassaatinik atuinermik akiuinnermut pitsaaliuinnermullu immikkut kattuffinnut timersoqatigiinnullu peqatigiiffinnut suleqatigiinnissamik isumaqatigiissusiornissaat.

Nr. 9-imut

Aalajangersagaq allanngortinneqarpoq ilassuteqarnikkut immikkut immikkut kattuffiit timersornermullu peqatigiiffiit Kalaallit Nunaannit Timersornermut Kattuffimmut attuumassuteqanngitsut immikkut kattuffiit, timersornermut peqatigiiffiit kiisalu qasujaallisarfiit timigissartarfiillu atuisunut aamma ilisimatitsissuteqartussaaitaalernerinik Nakorsaatit Pissassaaitut Atorneqartarnerinut Kalaallit Nunaanni Akiuisunik suleqatigiinnissamut isumaqatigiissuteqarsimanerlutik.

§ 2-mut

Aalajangersakkami siunnersuuttip atuutilerfissaa allanneqarpoq.

Piffissaq atuutilerfik tapiissutit eqqarsaatigalugit kiisalu Nakorsaatit Pissassaaitut Atorneqartarnerinut Kalaallit Nunaanni Akiuisunik allanngortitsinikkut pitsanngorsaaniarneq aaqqissuussiniarnerlu allannguutai eqqarsaatigalugit pissasoq siunnersuutigineqarpoq.

Siunnersuut inatsimmut atuuttumut sanilliullugu	
<i>Oqaasertaliunneqartut atuuttut</i>	<i>Inatsisissatut siunnersuut</i>
§ 1. Inatsit timersornermut tunngasunut atorneqarpoq, ataasiakkaallu peqqissuunerat, atugarissaarnerat aamma timikkut, tarnikkut inuuniarnikkullu ineriartornerisa unammillersinnaanerisalu nukittorsarneqarnissaat siunertaralugit timersornermik siuarsaassaaq, tassunga ilanngullugu unammilluni timersornermik timigissarnermillu siuarsaassaaq.	1. § 1, imatut oqaasertalerneqassaaq: " § 1. Inatsisartut inatsisaata timersorneq siuarsassavaa, tassunga unammilluni timersorneq timigissarnerlu ilaapput, tamatumuunakkut inuit ataasiakkaat peqqissusiat, atugarissaarnerat, aamma timikkut, tarnikkut, inooqatigiinnikkullu ineriartornerat kiisalu unammillersinnaassuseqarnerat nukittorsarniarneqarpoq. <i>Imm. 2.</i> Unammilluni timersorneq tassaavoq timersornermi unamminertalimmi, malittarisassat aalajangersimasut malillugit ingerlanneqartartoq. Unammilluni timersorneq timersornikkut, eqqarsartaatsikkut elektroniskimillu periarfissat atorlugit ingerlanneqarsinnaavoq."
§ 2. Inatsimmi matumani timersorneq tassaavoq timigissarniarluni aamma peqqissarniarluni timi atorlugu sammisaqarneq. <i>Imm. 2.</i> Inatsimmi matumani timigissarneq tassaavoq kalooriat timimi uunneqartillugit imaluunniit inuit ataasiakkaat timikkut atugarissaarnerat peqqinnerallu nukittorsarniarlugu timi atorlugu sammisaqarnerit. <i>Imm. 3.</i> Inatsimmi matumani sunngiffimmi peqqissarneq tassaavoq tarnikkut, sianissutsikkut timikkullu sammisaqartarneq pilerseqqinniarlugu. <i>Imm. 4.</i> Inatsimmi matumani unammilluni timersorneq tassaavoq timersornerup ilaa, aalajangersimasunik maleruagassaqarluni ingerlanneqartartoq, taakkunanilu unammineq.	2. § 2 peerneqarpoq.
	3. § 11-p kingorna § 11 a allanneqassaaq: " § 11 a. Immikkut kattuffinnut timersoqatigiiffinnullu Kalaallit Nunaanni Timersoqatigiit Kattuffiannut ilaasortaannigitsunut aningaasanut inatsimmi aningaasaliinertigut Naalakkersuisut ukiumoortumik tapiissuteqartarput. <i>Imm. 2.</i> Tapiissutit ilai siunertanut

	aalajangersimasunut immikkut atugassanngortinneqarsinnaapput. <i>Imm. 3.</i> Tapiissutit atugassarititanik aalajangersimasunik piumasaqaatitaqarsinnaapput."
§ 13. Kalaallit Nunaanni Timersoqatigiit Kattuffiannut aamma Elite Sport Greenlandimut Naalakkersuisut tapiissuteqarneranni piumasarineqartoq taakku nakorsaait pissassaaitut atorineqartartut pitsaaliornissaat akiuinerlu pillugu Nakorsaait Pissassaaitut Atorneqarnerinut Kalaallit Nunaanni Akiuisut maleruagassanik aalajangersagaanik malitsissasut eqqortitsissasullu pillugu maleruagassanik aalajangersaaneq, § 21, imm. 2, nr. 5 takuuk. Malittarisassanik taakkuninnga peqqarniitsumik, arlaleriarluniluunniit unioqqutitsinerit tapiiffigitinnissamut pisinnaatitaajunnaarnermik kiisalu tapiissutit tunniunneqarsimasut utertillugit akiliisoqarnissaannik piumasaqaateqarnermik kinguneqassaaq. <i>Imm. 2.</i> Kalaallit Nunaanni Timersoqatigiit Kattuffiannut aamma Elite Sport Greenlandimut Naalakkersuisut tapiissuteqarneranni piumasarineqarpoq timersorluni unamminernik allanngortiteriniarnerup pitsaaliornissaa akiuiniarnerlu pillugit Naalakkersuisut maleruagassiaannik malinnissasut atortissasullu pillugu maleruagassanik aalajangersaaneq, § 5 imm. 2 takuuk. Malittarisassanik taakkuninnga peqqarniitsumik, arlaleriarluniluunniit unioqqutitsinerit tapiiffigitinnissamut pisinnaatitaajunnaarnermik kiisalu tapiissutit tunniunneqarsimasut utertillugit akiliisoqarnissaannik piumasaqaateqarnermik kinguneqassaaq.	4. § 13 imatut oqaasertalerneqassaaq: " § 13. §§ 11, 11 a aamma 12 naapertorlugu tapiissuteqarnissamut piumasaqaataavoq tapiissuteqarfigineqartussanit Nakorsaait Pissassaaitut Atorneqartarnerinut Kalaallit Nunaanni Akiuisunit nakorsaait pissassaaitut atorineqarnerinik pitsaaliornissaq akiuinissarlu pillugit aalajangerneqarsimasut malinneqarlutillu eqquutsinneqassasut, tak. § 21, imm. 2, nr. 5. Malittarisassanik taakkuninnga peqqarniitsumik arlaleriarluniluunniit unioqqutitsinerit tapiiffigitinnissamut pisinnaatitaajunnaarnermik kiisalu tapiissutit tunniunneqarsimasut utertillugit akiliisoqarnissamik piumasaqaateqarnermik kinguneqassaaq. <i>Imm. 2.</i> §§ 11, 11 a aamma 12 naapertorlugu tapiissuteqarnissamut piumasaqaataasinnaavoq tapiissuteqarfigineqartussanit Naalakkersuisunit timersorluni unamminernik allanngortiteriniarnermik pitsaaliornissaq akiuinissarlu pillugit aalajangerneqarsimasut malinneqarlutillu eqquutsinneqassasut, tak. § 5, imm. 2. Malittarisassanik taakkuninnga peqqarniitsumik arlaleriarluniluunniit unioqqutitsinerit tapiiffigitinnissamut pisinnaatitaajunnaarnermik kiisalu tapiissutit tunniunneqarsimasut utertillugit akiliisoqarnissamik piumasaqaateqarnermik kinguneqassaaq."
§ 19. Kalaallit Nunaanni Timersoqatigiit Kattuffiat tassaavoq Kalaallit Nunaanni timersornikkut timigissarnikkullu aaqqissugaasumik ingerlataqarnermut nuna tamakkerlugu pisortatigoortumik sinniisoq. Kattuffik pisortatigoortumik Kalaallit Nunaannut, tassunga ilanngullugu nunanut tamalaanut atatillugu sinniisuvoq.	5. § 19 imatut oqaasertalerneqassaaq: " § 19. Kalaallit Nunaanni Timersoqatigiit Kattuffiat tassaavoq Kalaallit Nunaanni timersornikkut timigissarnikkullu aaqqissugaasumik ingerlataqarnermut nuna tamakkerlugu pisortatigoortumik sinniisoq. Kattuffik pisortatigoortumik Kalaallit Nunaannut, tassunga ilanngullugu nunanut assigiinngitsut akornngannut atatillugu

	sinniisuuvoq, taamaattorli imm. 2 takuuk. <i>Imm. 2.</i> Timersuutit immikkut kattuffiitut timersoqatigiiffinnullu Kalaallit Nunaanni Timersoqatigiit Kattuffiannut ilaasortaannngitsunut tunngatillugu, timersuummi pineqartumi kattuffiup pisortatigoortumik, tassunga ilanngullugu nunat assigiinngitsut akornnganni Kalaallit Nunaat sinniisuuffigissavaa."
§ 20. Suliffeqarfik imminut pigisoq Elite Sport Greenland tassaavoq timersortartunik pikkorivissunik siuarsaanermi inerisaanermilu Kalaallit Nunaanni nuna tamakkerlugu sulisoq. Kalaallit Nunaanni Timersoqatigiit Kattuffiat peqatigalugu pisortatigoortumik Kalaallit Nunaannut, tassunga ilanngullugu nunanut tamalaanut atatillugu sinniisuuvoq. <i>Imm. 2.</i> Elite Sport Greenland Kalaallit Nunaanni Timersoqatigiit Kattuffiat tassanilu immikkut kattuffiit, timersoqatigiiffiit aamma timigissartarfiit suleqatigalugit siunertaminik tapersersuissaaq, ilaatigut ukununga tapersersuinermigut: 1) timersornermi piginnaaneqarlutut nunarpullu sinnerlugu unammisartut sungiusarnerat unammiaaarnermilu peqataanerat, nunat tamalaat akornanni pikkorinnerit peqataanissaannut periarfissanik siuarsaasut, 2) piginnaasaqarlutut inerisaaneq, tassani siunertarineqarluni kingusinnerusukkut nunat tamalaat akornanni pikkorinnerit unammiaaarnernut peqataanissaat, 3) pikkorinnernut sungiusaasut ilinniartinnerilu, 4) Kalaallit Nunaanni timersornermi nakorsaasersuinermik ilisimasanik inerisaaneq, aamma 5) kalaallit immikkut kattuffiit aaqqissuusaanikkut inerisaaneq nunanut allanut unammisartut soqutigisaannik nunallu akornanni peqataanermut isumaginninneq.	6. § 20, imm. 1 aamma 2, imatut oqaasertalerneqassapput: " § 20. Suliffeqarfik imminut pigisoq Elite Sport Greenland tassaavoq timersortartunik pikkorivissunik siuarsaanermi inerisaanermilu Kalaallit Nunaanni nuna tamakkerlugu sulisoq. Pisortatigoortuni, soorlu nunat assigiinngitsut akornnganni, kattuffik Kalaallit Nunaannut sinniisuuvoq. Timersornermik timigissarnikkullu aaqqissugaasumik ingerlataqarneq pillugu Kalaallit Nunaanni Timersoqatigiit Kattuffiat peqatigalugu sinniisuuneq pisarpoq. Immikkut kattuffik aamma timersortartut peqatigiiffiat Kalaallit Nunaanni Timersoqatigiit Kattuffiannut ilaasortaannngikkaangat timersuummi pineqartumut immikkut kattuffik peqatigalugu sinniisuuneq pisarpoq. <i>Imm. 2.</i> Elite Sport Greenland Kalaallit Nunaanni Timersoqatigiit Kattuffiat tassanilu immikkut kattuffiit, matumani Kalaallit Nunaanni Timersoqatigiit Kattuffiannut ilaasortaannngitsut, timersoqatigiiffiit aamma timigissartarfiit suleqatigalugit siunertaminik tapersersuissaaq ilaatigut ukununga tapersersuinermigut: 1) timersornermik piginnaasallit timersortartullu pikkorivissut sungiusarnerinut aamma unammineri peqataanerinut, nunani tamalaani pikkorivissut timersornerini peqataanissamut periarfissamik siuarsaasoq, 2) nunat assigiinngitsut akornnganni timersornermi kingusinnerusukkut peqataanissaq siunertarlugu piginnaasalinnik inerisaaneq, 3) pikkorivissut pillugit sungiusaasut ilinniartitsinerillu, 4) Kalaallit Nunaanni timersornermi nakorsaanikkut immikkut ilisimasalinnik

	ineriartortitsineq, aamma 5) pikkorivissut soqutigisaannik isumaginninneq nunallu assigiinngitsut akornganni peqataanissaq siunertaralugu Kalaallit Nunaanni immikkut kattuffinnik aaqqissugaasumik ineriartortitsineq.
<i>Imm.</i> Kalaallit Nunaanni Timersoqatigiit Kattuffiat ataatsimiititaliamit atorneqarsinnaasumik allattoqarnikkut ikiuissaaq.	7. § 22, imm. 5, imatut oqaasertalerneqassaaq: " <i>Imm.</i> 5. Naalakkersuisut aalajangiisartut allattoqarfeqartissavaat."
§ 23. Kalaallit Nunaanni Timersoqatigiit Kattuffianut ilaasut immikkut kattuffiit, timersoqatigiiffiit, timersornermi klubbit aamma timigissartarfiit avatanni timersornermi timigissarnermilu nakorsaatinik pissassaaticut atuinerup pinngitsoortinnissaanik siunertaqarluni Nakorsaatit Pissassaaticut Atorneqartarnerinut Kalaallit Nunaanni Akiuisut nakorsaatit pissassaaticut atorneqarnerinik pitsaaliornissaq akiuinissarluk pillugit ukuninnga suleqateqarnissamik isumaqatigiissuteqassaaq: 1) Timigissartarfiit allallu ingerlataqarfiit timersornermik imaluunniit timigissarluni sammisaqartitsinermik taakkunungaluunniit eqqaanartunik sammisaqartitsisut aamma 2) Kalaallit Nunaanni Timersoqatigiit Kattuffianut ilaanngitsut Nakorsaatit Pissassaaticut Atorneqartarnerinut Kalaallit Nunaanni Akiuisunik suleqatigiinnissamik isumaqatigiissuteqarsimanerlutik atuisunut paasissutissiissutigissavaat.	8. § 23, imm. 1, imatut oqaasertalerneqassaaq: " § 23. Kalaallit Nunaanni Timersoqatigiit Kattuffiannut ilaasut immikkut kattuffiit, timersoqatigiiffiit, timersornermi klubbit aamma timigissartarfiit avatanni timersornermi timigissarnermilu nakorsaatinik pissassaaticut atuinerup pinngitsoortinnissaanik siunertaqarluni Nakorsaatit Pissassaaticut Atorneqartarnerinut Kalaallit Nunaanni Akiuisut nakorsaatit pissassaaticut atorneqarnerinik pitsaaliornissaq akiuinissarluk pillugit ukuninnga suleqateqarnissamik isumaqatigiissuteqassapput: 1) timigissartarfinnik ingerlataqarfinnillu allanik timersornikkut imaluunniit timigissarnikkut sammisaqartitsinermik neqerooruteqartut imaluunniit taakkunungalu eqqaanartunik sammisaqartitsisut aamma Kalaallit Nunaanni Timersoqatigiit Kattuffiannut ilaanngitsut, aamma 2) Kalaallit Nunaanni Timersoqatigiit Kattuffiannut ilaasut immikkut kattuffiit, timersoqatigiiffiit, timersornermi klubbit aamma timigissartarfiit avatanni timersornermi timigissarnermilu ingerlataqartut immikkut kattuffii."
§ 24. Timigissartarfiit allallu ingerlataqarfiit timersornermik imaluunniit timigissarluni sammisaqartitsinermik taakkunungaluunniit eqqaanartunik sammisaqartitsisut aamma Kalaallit Nunaanni Timersoqatigiit Kattuffianut ilaanngitsut, Nakorsaatit Pissassaaticut Atorneqartarnerinut Kalaallit Nunaanni Akiuisunik suleqatigiinnissamik	9. § 24, imm. 1, imatut oqaasertalerneqassaaq: " § 24. Timigissartarfiit allallu ingerlataqarfiit timersornermik imaluunniit timigissarluni sammisaqartitsinermik taakkunungaluunniit eqqaanartunik sammisaqartitsisut aamma Kalaallit Nunaanni Timersoqatigiit Kattuffiannut ilaanngitsut, Nakorsaatit Pissassaaticut

isumaqatigiissuteqarsimanerlutik atuisunut paasissutissiissutigissavaat, tak. § 23. Kalaallit Nunaanni Timersoqatigiit Kattuffianut ilaasut immikkut kattuffiit, timersoqatigiiffiit aamma timigissartarfiit avataanni timersornermi timigissarnermilu ingerlataqartut kattuffii.	Atorneqartarnerinut Kalaallit Nunaanni Akiuisunik suleqatigiinnissamik isumaqatigiissuteqarsimanerlutik atuisunut paasissutissiisassapput, tak. § 23. Taamatuttaarlu immikkut kattuffinnut timersoqatigiiffinnullu aamma timersoqatigiiffiit timigissartartullu kattuffiitut Kalaallit Nunaanni Timersoqatigiit Kattuffiannut ilaasortaangitsunut imaluunniit Kalaallit Nunaanni Timersoqatigiit Kattuffianniittunut immikkut kattuffinnut, timersoqatigiiffinnut kiisalu timigissartarfinnut attuumassuteqanngitsunut aamma atuuppoq.”
	§ 2 Inatsisartut inatsisaat ulloq 1. januar 2027 atuutilissaaq.

Tusarniaanermut allakkiaq

Siunnersuut tamanut ammasumik ukununnga ulluni 23. Decembari-mit 23. januar-imut 2025 tusarniaassutigineqarpoq:

Xxxx

Taassuma saniatigut siunnersuut Naalakkersuisut tusarniaanerminni nittartagaat aqqutigalugu piffissami tassani takuneqarsinnaavoq.